

阿毗達磨法蘊足論卷第七

七

尊者大目乾運造

唐三藏法師玄奘奉詔譯

無色品第十三

一時薄伽梵在室羅筏住逝多林給孤獨園
爾時世尊告苾芻衆有四無色何等爲四謂
七有苾芻超諸色想滅有對想不思惟種種想
入無邊空空無邊處具足住是名第一復有
苾芻超一切種空無邊處入無邊識識無邊
處具足住是名第二復有苾芻超一切種識
無邊處入無所有無所有處具足住是名第
三復有苾芻超一切種無所有處入非想非
非想處具足住是名第四

超諸色想者云何諸色想謂眼識相應想等
想現前等想解了取像已想當想總名色想

有作是說與五識相應想等想乃至已想當
想總名色想今此義中惟眼識相應想等想
乃至已想當想總名色想如是色想爾時超
越等超越故名超諸色想滅有對想者云何
有對想謂耳等四識相應想等想乃至已想
當想總名有對想有作是說瞞恚相應想等
想乃至已想當想總名有對想今此義中耳
等四識相應想等想乃至已想當想總名有
對想如是有對想爾時斷徧知遠離極遠離
調伏極調伏隱沒除滅故名滅有對想不思
惟種種想者云何種種想謂有蓋纏者所有
染汙色聲香味觸想所有不善想所有非理
所引想所有障礙定想總名種種想彼想爾
時不復引發不復憶念不復思惟不復已思
惟不復當思惟故名不思惟種種想入無邊

空空無邊處具足住者云何空無邊處定加行修何加行入空無邊處定謂於此定初修業者先應思惟第四靜慮爲麤苦障次應思惟空無邊處爲靜妙離彼於爾時若心散亂馳流餘境不能一趣不能守念令住一緣修空無邊處定齊此未名空無邊處定加行亦未名入空無邊處定彼若爾時攝錄自心令不散亂馳流餘境能令一趣住念一緣思惟修習空無邊處定相如是思惟發勤精進勇健勢猛熾盛難制勵意不息是名空無邊處定加行亦名入空無邊處定彼於此道生已修習多修習故便令心住等住近住安住一趣等持無二無退齊此名爲已入空無邊處定又此定中諸心意識名空無邊處定俱有心諸思等思乃至造心意業名空無邊處定

俱有意業諸心勝解已勝解當勝解名空無邊處定俱有勝解又此定中若受若想乃至若慧等名空無邊處定俱有諸法如是諸法亦名空無邊處定超一切種空無邊處者謂彼爾時於空無邊想超越等超越故名超一切種空無邊處入無邊識識無邊處具足住者云何識無邊處定加行修何加行入識無邊處定謂於此定初修業者先應思惟空無邊處爲麤苦障次應思惟識無邊處爲靜妙離餘廣說如空無邊處超一切識無邊處者謂彼爾時於識無邊處想超越等超越故名超一切種識無邊處入無所有無所有處具足住者云何無所有處定加行修何加行入無所有處定謂於此定初修業者先應思惟識無邊處爲麤苦障次應思惟無所有處爲

靜妙離餘廣說如空無邊處超一切種無所有處者謂彼爾時於無所有處想超越等超越故名超一切種無所有處入非想非非想處具足住者云何非想非非想處定加行修何加行入非想非非想處定謂於此定初修業者先應思惟無所有處爲麁苦障次應思惟非想非非想處爲靜妙離餘廣說如空無邊處

修定品第十四

一時薄伽梵在室羅筏住逝多林給孤獨園爾時世尊告苾芻衆有四修定何等爲四謂有修定若習若修若多所作能令證得現法樂住復有修定若習若修若多所作能令證得現法樂住復有修定若習若修若得殊勝智見復有修定若習若修若能令證得勝分別慧復有修定若習若修若

多所作能令證得諸漏永盡云何修定若習若修若多所作能令證得現法樂住謂有苾芻即於自身離生喜樂滋潤徧滋潤充滿徧充滿適悅徧適悅故離生喜樂於自身中無有少分而不充滿是名修定若習若修若多所作能令證得現法樂住云何修定若習若修若多所作能令證得殊勝智見謂有苾芻於光明想善攝受善思惟善修習善通達若晝若夜無有差別若前若後無有差別若下若上無有差別開心離蓋修照俱心除闇昧心修無量定是名修定若習若修若多所作能令證得殊勝智見云何修定若習若修若多所作能令證得勝分別慧謂有苾芻善知受生善知受住善知受滅盡沒於此住念非不住念及善知想善知尋於此住念非不住

念是名修定若習若修若多所作能令證得勝分別慧云何修定若習若修若多所作能令證得諸漏永盡謂有苾芻於五取蘊數數隨觀生滅而住謂此是色此是色集此是色滅此是受想行識此是受想行識集此是受想行識滅是名修定若習若修若多所作能令證得諸漏永盡爾時世尊爲攝前義而說

頌言
斷欲想憂俱離惛沈惡作得清淨捨念法尋伺前行現法樂爲初次勝知見慧破無明等漏後證解脫果

即於自身者謂身亦名身身根亦名身五色根亦名身四大種所造聚亦名身今此義中意說四大種所造聚名身離生喜樂者謂初靜慮所有喜樂平等受受所攝身輕安心輕

安是名喜樂如是喜樂從離欲惡不善法起等起生等生聚集出現故名離生喜樂滋潤徧滋潤充滿徧充滿適悅徧適悅者謂即於自四大種所造聚身離生喜樂起等起生等生聚集出現滋潤徧滋潤是一義充滿徧充满是一義適悅徧適悅是一義由下中上長養差別譬如農夫初以少水溉灌畦壠爾時畦壠滋潤徧滋潤次以中水溉灌畦壠爾時畦壠充滿徧充滿後以多水溉灌畦壠爾時畦壠適悅徧適悅苾芻亦爾初以下品離生喜樂長養大種所造聚身爾時自身滋潤徧滋潤次以中品離生喜樂長養大種所造聚身爾時自身充滿徧充滿後以上品離生喜樂長養大種所造聚身爾時自身適悅徧適悅離生喜樂於自身中無有少分而不充滿

者謂從定至頂離生喜樂作長養事無不充
滿是名修定者云何爲定謂即於自身離生
喜樂滋潤徧滋潤充滿徧充滿適悅徧適悅
故心住等住近住安住不散不亂攝止等持
心一境性總名爲定云何爲修謂於此定若
修若習恒作常作加行不捨總名爲修若習
若修若多所作者顯於此定能得自在能令
證得現法樂住者謂於此定若習若修若多
所作於現法中證得樂住可愛可樂可欣可
意無所希望無所思慕寂靜安隱故名樂住
於此樂住得獲成就親近觸證故名證得復
次初靜慮所攝離生喜樂俱行心一境性說
名爲定即於此定若修若習恒作常作加行
不捨說名爲修若習若修若多所作顯彼自
在能今證得現法樂住義如前說

卷七

六

於光明想善攝受等者云何光明定加行修
何加行入光明定謂於此定初修業者先應
善取淨月輪相或復善取淨日輪相或復善
取藥物末尼諸天宮殿星宿光明或復善取
燈燭光明或復善取焚燒城邑川土光明或
復善取焚燒山澤曠野光明或復善取焚燒
十擔或二十擔或三十擔或四十擔或五十
擔或百擔或千擔或百千擔或無量百擔或
無量千擔或無量百千擔薪火光明此火光
明熾盛極熾盛洞然徧洞然隨取一種光明
相已審諦思惟解了觀察勝解堅住而分別
之彼於爾時若心散亂馳流餘境不能一趣
不能守念令住一緣思惟所取諸光明相齊
此未名光明定加行亦未名入光明定彼若
爾時攝錄自心令不散亂馳流餘境能令一

趣住念一緣思惟如是諸光明相如是思惟發勤精進乃至勵意不息是名光明定加行亦名入光明定彼於此道生已修習多修習故便令心住等住近住安住一趣等持無二無退思惟如是諸光明相齊此名爲已入光明定而未名爲光明定想云何名爲光明定想謂即依止前光明定思惟如前諸光明相諸想等想解了取像已想當想名光明定想此光明定想名光明想於光明想善攝受者謂於此想恭敬攝受殷勤攝受尊重攝受思惟彼因彼門彼理彼方便彼行相故名善攝受善思惟者謂數數起光明想已數數思惟光明相想善修習者謂於此想數習數修數多所作故名善修習善通達者謂於此想等了審了等審觀察故名善通達若晝若夜無

有差別者謂如晝分審諦思惟解了觀察勝解堅住分別如前諸光明相夜分亦爾如於夜分審諦思惟解了觀察勝解堅住分別如前諸光明相晝分亦爾故名若晝若夜無有差別若前若後無有差別者謂如對面審諦思惟解了觀察勝解堅住分別如前諸光明相背面亦爾如於背面對面亦爾復次如於前時審諦思惟解了觀察勝解堅住分別如前諸光明相今時亦爾如於今時前時亦爾故名若前若後無有差別若下若上無有差別者謂如於下方審諦思惟解了觀察勝解堅住分別如前諸光明相於上方亦爾如於上方於下方亦爾故名若下若上無有差別開心者謂發起光明照了鮮淨俱行之心離蓋者謂遠離惛沈睡眠纏蓋心用明了修照

俱心者謂修習光明照了鮮淨俱行之心除闇昧心者謂此心中不起闇昧相惟起光明相如燈燭光明了除闇相修無量定者謂修無量光明相定是名修定者云何爲定謂即於光明審諦思惟解了觀察勝解堅住分別所起心住等住乃至心一境性總名爲定云何爲修謂於此定若修若習恒作常作加行不捨總名爲修若修若多所作者顯於此定能得自在能令證得殊勝智見者云何名爲殊勝智見謂於此定若修若多所作至圓滿位於舊眼邊發起色界大種所造清淨天眼依此天眼生淨眼識依此眼識能偏觀察前後左右上下諸色如如色界大種所造清淨天眼舊眼邊起如是如是生淨眼識依此眼識領受觀察彼諸色是名此中

陸七

八

殊勝智見有作是說由意淨故勝解觀見即人肉眼變成天眼名勝智見今此義中即前所說清淨眼識相應勝慧說名爲智亦名爲見謂天眼識相應勝慧領受觀察彼諸色是名此中殊勝智見彼於此定若習若修若多所作能令證得殊勝智見得獲成就親近觸證殊勝智見故名證得復次光明想俱行心一境性說名爲定即於此定若修若習恒作常作加行不捨說名爲修若習若多所作顯彼自在能令證得殊勝智見上義如前說善知受生善知受住善知受滅盡沒者謂審觀受生審觀受住審觀受滅盡沒於此住念非不住念者謂審觀受生時具念正知審觀受住時具念正知審觀受滅盡沒時具念正知及善知想善知尋者謂審觀想尋生審

觀想尋住審觀想尋滅盡沒於此住念非不
住念者謂審觀想尋生時具念正知審觀想
尋住時具念正知審觀想尋滅盡沒時具念
正知是名修定者云何爲定謂彼爾時作如
是念我於諸法應正思惟不起不善法起諸
善法不起無記法起有記法令不善法不久
住令諸善法得久住令無記法不久住令有
記法得久住彼於爾時亦觀察心亦觀察心
所法彼觀察心心所法時所起心住等住乃
至心一境性總名爲定云何爲修謂於此定
若修若習恒作常作加行不捨總名爲修若
習若修若多所作者顯於此定能得自在能
令證得勝分別慧者謂於此定若習若修若
多所作能令一切不善慧非理所引慧所有
不善障礙定慧皆悉破壞捨置不起此相違

慧生長堅住由此故說能令證得勝分別慧
即於此慧得獲成就親近觸證故名證得復
次審觀受想尋俱行心一境性說名爲定即
於此定若修若習恒作常作加行不捨說名
爲修若習若修若多所作顯彼自在能令證
得勝分別慧義如前說

於五取蘊數數隨觀生滅而住等者謂如實
知色生及變壞如實知受想行識生及變壞
是名修定者云何爲定謂於五取蘊數數隨
觀生滅而住所起心住等住乃至心一境性
總名爲定云何爲修謂於此定若修若習恒
世七+
作常作加行不捨總名爲修若習若修若多
所作者顯於此定能得自在能令證得諸漏
永盡者漏謂三漏即欲漏有漏無明漏彼於
此定若習若修若多所作能令三漏盡等盡

偏盡究竟盡故名諸漏永盡於此永盡得獲
成就親近觸證故名證得復次第四靜慮所
攝清淨捨念俱行趣阿羅漢無間道所攝心
一境性說名爲定即於此定若修若習恒作
常作加行不捨說名爲修若習若修若多所
作顯彼自在能令證得諸漏永盡義如前說
覺支品第十五

一時薄伽梵在室羅筏住逝多林給孤獨園
時有苾芻來詣佛所到已頂禮世尊雙足却
住一面而白佛言世尊嘗說覺支覺支此言
何義世尊告曰此覺支言顯七覺支何等爲
七謂念覺支擇法覺支精進覺支喜覺支輕
安覺支定覺支捨覺支如是覺支漸次而起
漸次而得修令圓滿時彼苾芻復白佛言云
何覺支漸次而起漸次而得修令圓滿佛告

世七

十一

苾芻若有於身住循身觀安住正念遠離愚
癡爾時便起念覺支得念覺支修令圓滿彼
由此念於法揀擇極揀擇偏尋思徧伺察審
諦伺察爾時便起擇法覺支得擇法覺支修
令圓滿彼由擇法發勤精進心不下劣爾時
便起精進覺支得精進覺支修令圓滿彼由
精進發生勝喜遠離愛味爾時便起喜覺支
得喜覺支修令圓滿彼由此喜身心輕安遠
離麤重爾時便起輕安覺支得輕安覺支修
令圓滿彼由輕安便受快樂樂故心定爾時
便起定覺支得定覺支修令圓滿彼由心定
能滅貪憂住增上捨爾時便起捨覺支得捨
覺支修令圓滿於受心法住循受心法觀廣
說亦爾如是覺支漸次而起漸次而得修令
圓滿云何念覺支謂世尊說若聖弟子於此

內身住循身觀若具正勤正知正念除世貪
憂於彼外身住循身觀若具正勤正知正念
除世貪憂於内外身住循身觀若具正勤正
知正念除世貪憂於内外俱受心法三廣說
亦爾修習如是四念住念所有無漏作意相
應諸念隨念專念憶念不忘不失不遺不漏
不失法性心明記性總名爲念亦名念根亦
名念力亦名念覺支亦名正念是聖出世無
漏無取道隨行道俱有道隨轉能正盡苦作
苦邊際諸有學者如所見諸行思惟觀察令
至究竟於諸行中深見過患於永涅槃深見
功德若阿羅漢如解脫心思惟觀察令至究
竟所有無漏作意相應諸念隨念乃至心明
記性是名念覺支云何擇法覺支謂世尊說
若聖弟子能如實知善不善法有罪無罪法

應修不應修法下劣勝妙法黑白法有敵對
法緣生法能如實知善不善法者云何善法
謂善身語業善心心所法善心不相應行及
擇滅是名善法云何不善法謂不善身語業
不善心心所法不善心不相應行是名不善
法彼於如是善不善法以如實正慧擇極
揀擇偏尋思偏伺察審諦伺察是名能如實
知善不善法能如實知有罪無罪法者云何
有罪法謂三惡行三不善根十不善業道是
名有罪法云何無罪法謂三妙行三善根十
善業道是名無罪法彼於如是有罪無罪法
以如實正慧揀擇極揀擇偏尋思偏伺察審
諦伺察是名能如實知有罪無罪法能如實
知應修不應修法者云何應修法謂三妙行
三善根十善業道親近善士聽聞正法如理

作意法隨法行恭敬聽聞密護根門飲食知
量初夜後夜曾不睡眠勤修諸善是名應修
法復次四念住四正勝四神足五根五力七
等覺支八支聖道四正行四法迹奢摩他毗
鉢舍那亦名應修法云何不應修法謂三惡
陞七
行三不善根十不善業道親近不善士聽聞
不正法不如理作意行非法行不恭敬聽不
恭敬聞不密護根門飲食不知量初夜後夜
常習睡眠不勤修善是名不應修法彼於如
是應修不應修法以如實正慧揀擇極揀擇
偏尋思偏伺察審諦伺察是名能如實知應
修不應修法能如實知下劣勝妙法者云何
下劣法謂不善法及有覆無記是名下劣法
云何勝妙法謂諸善法及無覆無記是名勝
妙法彼於如是下劣勝妙法以如實正慧揀

擇極揀擇偏尋思偏伺察審諦伺察是名能
如實知下劣勝妙法能如實知黑白法者云
何黑白法謂不善法名黑善法名白有罪法
名黑無罪法名白不應修法名黑應修法名
白下劣法名黑勝妙法明白是名黑白法彼
於如是黑白法以如實正慧揀擇極揀擇偏
尋思偏伺察審諦伺察是名能如實知黑白
法能如實知有敵對法者云何有敵對法謂
貪無貪互相敵對瞋無瞋互相敵對癡無癡
互相敵對是名有敵對法彼於如有敵對
法以如實正慧揀擇極揀擇偏尋思偏伺察
審諦伺察是名能如實知有敵對法能如實
知緣生法者云何緣生法謂緣起法及緣已
生法總名緣生法彼於如是緣生法以如實
正慧揀擇極揀擇偏尋思偏伺察審諦伺察

是名能如實知緣生法彼如實知善不善法廣說乃至緣生法時所有無漏作意相應於法揀擇極揀擇最極揀擇解了等了近了機點通達審察聰睿覺明慧行毗鉢舍那總名爲慧亦名慧根亦名慧力亦名擇法覺支亦

名正見是聖出世無漏無取道隨行道俱有

道隨轉能正盡苦作苦邊際諸有學者如所見諸行思惟觀察令至究竟於諸行中深見過患於永涅槃深見功德若阿羅漢如解脫心思惟觀察令至究竟所有無漏作意相應

於法揀擇乃至毗鉢舍那是名擇法覺支云何精進覺支謂世尊說若聖弟子爲令已生惡不善法斷故起欲發勤精進策心持心爲令未生惡不善法不生故起欲發勤精進策心持心爲令未生善法生故起欲發勤精進

策心持心爲令已生善法堅住不爲忘修滿倍增廣大智作證故起欲發勤精進策心持心彼修如是四正勝時所有無漏作意相應諸勤精進勇健勢猛熾盛難制勵意不息總名精進亦名精進根亦名精進力亦名精進覺支亦名正勤是聖出世無漏無取道隨行道俱有道隨轉能正盡苦作苦邊際諸有學者如所見諸行思惟觀察令至究竟於諸行中深見過患於永涅槃深見功德若阿羅漢如解脫

心思惟觀察令至究竟所有無漏作意相應諸勤精進乃至勵意不息是名精進覺支云何喜覺支謂世尊說大名當知若聖弟子以如是相隨念諸佛謂此世尊是如來阿羅漢正等覺明行圓滿善逝世間解無上

丈夫調御士天人師佛薄伽梵彼聖弟子以

如是相隨念佛時貪不纏心瞋不纏心癡不

纏心於如來所其心正直心正直故得義威勢得法威勢於如來所能引起欣欣故生喜心喜故身安身安故受樂樂故心定心定故於不平等諸有情類得住平等於有惱害諸有情類住無惱害得預法流於正法所修隨念故乃至能證究竟涅槃

復次大名若聖弟子以是相隨念僧伽謂佛

弟子具足妙行質直行如理行法隨法行和敬行隨法行又佛弟子有預流向有預流果有一來向有一來果有不還向有不還果有阿羅漢向有阿羅漢果如是總有四雙八隻補特伽羅如是僧伽戒具足定具足慧具足解脫具足解脫知見具足應請應屈應恭敬無上福田世所應供彼聖弟子以如是相隨念僧時貪不纏心瞋不纏心癡不纏心於正法所其心正直心正直故得義威勢得法威勢於正法所能引起欣欣故生喜心喜故身安身安故受樂樂故心定心定故於不平等諸有情類得住平等於有惱害諸有情類住無惱害得預法流於僧伽所修隨念故乃至能證究竟涅槃

能證究竟涅槃復次大名若聖弟子以如是相隨念自戒謂我淨戒不缺不穿不雜不穢堪受供養無隱昧善究竟善受持智者稱讚常無譏毀彼聖弟子以如是相隨念自戒時貪不纏心瞋不纏心癡不纏心於自戒所其心正直心正直故得義威勢得法威勢於自戒所能引起欣故生喜心喜故身安身安故受樂樂故心定心定故於不平等諸有情類得住平等於有惱害諸有情類住無惱害得預法流於自戒所能引起欣欣故生喜心喜故身安身安故受樂樂故心定心定故於不平等諸有情類得住平等於有惱害諸有情類住無惱害得預法流於自戒所修隨念故乃至能證究竟涅槃復次大名若聖弟子以如是相隨念諸天謂有四大王衆天三十三天夜摩天覩史多天樂變化天他化自在天如是諸天成就信故戒故聞故捨故慧故從此處沒生彼天中受諸快樂我亦有信戒聞捨慧亦當生彼與諸天衆同受快樂彼聖弟子以如是相隨念天時貪不纏心瞋不纏心癡不纏心於諸天所其心正直心正直故得義威勢得法威勢於諸天所

能引起欣欣故生喜心喜故身安身安故受

樂樂故心定心定故於不平等諸有情類得
住平等於有惱害諸有情類住無惱害得預
法流於諸天所修隨念故乃至能證究竟涅
槃彼修如是六隨念時所有無漏作意相應

心欣極欣現前極欣欣性欣類適意說意喜
性喜類樂和合不別離歡欣悅豫有堪任性
踊躍性歡喜歡喜性總名爲喜亦名喜覺支
是聖出世無漏無取道隨行道俱有道隨轉
能正盡苦作苦邊際諸有學者如所見諸行
思惟觀察令至究竟於諸行中深見過患於
求涅槃深見功德若阿羅漢如解脫心思惟
觀察令至究竟所有無漏作意相應心欣極
欣乃至歡喜歡喜性是名喜覺支

阿毗達磨法蘊足論卷第七

說一切
有部

卷七

大

音釋

溉灌

溉古代切澆也灌古玩切沃也

畦壠

畦玄圭切壠龍魯勇切田畦

奢摩他

也梵語也此云止

奢

詩車切

毗鉢舍那

此梵語也云觀

鉢

此頻眉切

舍

那切

舍那

此梵語也云觀